

Inissiani attartortittakkani ineqarnermut tapiissutit pillugit Inatsisartut peqqussutissaattut siunnersuummut nassuiaatit.

Nassuiaatit nalinginnaasut

Ineqarnermut tapiissutit pillugit inatsisartut peqqussutissaattut siunnersuut Isumaginninnermik Iluarsaaqqinnermut Ataatsimiititaliarsuup aamma Sikringsgruppip inassuteqaataasa inernerat.

Aaqqissuussinerup nutaap siunertarai:

1. ineqarnermut meeqqanut tapiissutinik aamma ineqarnermut tapiissutinik tunniussisarnermut taarsiullugu, ineqarnermut akiliutitut aaqqiissuteqartarnerup maleruagassiunneqarnerisa ataasiinnangortinneqarnissaa,
2. maannakkut aningaasanut killiliussanit 128.000 kr-nit annertunerusunik isertitallit inoqutigii ineqarnermut tapiissutinik tunineqarsinnaalernissaat,
3. inissiani attartortittakkani najugalinnut ineqarnermut meeqqanut tapiissutit peerneqarnissaat,
4. inoqutigii akileraaruteqaataasussatut isertitaat aamma meeqqat amerlassusiat tunngavigalugit nammineq akileeqataassutissat aalajangersarneqartarnissaat.

Ineqarnermut tapiissutit pillugit aaqqissuussaq nutaaq inissiani attartortittakkani ineqarnermut akiliutit aaqqiissuteqqinneqarnerannut naleqqiullugu suliarineqarsimavoq, taamaattumillu ilaatigut tassani ineqarnermut tapiissutit aaqqissuussaq inissiani attartortittakkani aammalu boligstuttemit illuutit ilaannut, kapitel 4-mit illunik taaneqartartunut atuutsiinnarnissaa naleqqutinngitsutut isigineqarsimalluni. Taamaattumik ineqarnermut tapiissutit pillugit peqqussutissatut siunnersuut manna taamaallaat inissianut attartortittanut atuuppoq.

Peqqussutikkut boligstuttemit illutini ineqarnermut tapiissutit 30. april 2002-miit atuutilersumik peerneqarput, kisiannili meeqqat amerlassusiat tunngavigalugit akiligassanik annikilliliisarneq atuutsiinnarneqarluni. Allatut ittut nammineq pigalugit aammalu piginneqatigiinnikkut inigisat tamarmik maannamut ineqarnermut meeqqanut tapiissutinik imaluunniit ineqarnermut tapiissutinik pisinnaasimangillat, taamaattumik inigisanik piginnittut akornanni assigiimmik periarfissaqarnissaq eqqarsaatigalugu kapitel 4-mit illuutini ineqarnermut tapiissutisinnissamik periarfissap peerneqarnissaa naleqquttuutinneqarpoq. Meeqqat amerlassusai tunngavigalugit akiligassanik annikilliliisarneq atuutsiinnarneqarpoq, taarsigassarsinermi atugassarititaanera pissutigalugu.

Inatsisartut peqqussutaannut maannakkut atuuttumut naleqqiullugu allannguutit pingaarnerit kapitali 1-imi Aalajangersakkat nalinginnaasuniillutillu kapitali 3-mi Aqutsinermiipput. Kapitalini allani allannguutit oqaasertalersugaanerannut teknikkimullu tunnganerupput.

Siunnersuut tusarniaassutigineqareersimavoq akissutillu tiguneqarsimapput KANUKOKA-mit, pisorta qarfinnit aammalu sulisartut kattuffiinit. Tusarniaanermi akissutit peqqussummi imaluunniit nassuiaatini ilanngunneqareerput.

Aalajangersakkani ataasiakkaani nassuiaatit

§ 1-mut

Inissianut attartortittakkanut nassuiaat taaneqarpoq inissianik attartorneq pillugu inatsisartut peqqussutaanni pineqartut. Inigisat suut pineqarnersut ineqarnermut tapiissutit pillugit qppersagaaqqami paasissutissiissutigineqassapput.

Siornatigumut naleqqiullugu namminersortumik inissiaatini ineqarnermut tapiisoqarsinnaavoq ineqarnermut akiliutip annertussusaa apeqqutaatinnagu. Namminersortumik attartornerni akisuuni ineqarnermut tapiissutinut aningaasartuuteqarnissaq naatsorsuutigineqanngilaq, taakkunani ineqartut ineqarnermut tapiissutisinissamut killissarititaq qaangerlugu isertitaqarunarmata. Taamaattoq § 6, imm. 3 malillugu ineqarnermut tapiissutit annerpaaffilerlugit tunniunneqassapput.

§ 2-mut

Maannakkutut tunngavissaatinneqarpoq kikkut inoqutigiinnut ilaanerannik aalajangiinermi inuit allattorsimaffianni paasissutissat aallaavigineqassasut.

§ 3-mut

Aaliangersakkap oqaasertai allannguuteqartilaarlugit atuutsiinnarneqarpoq. Allannguuteqavinnissaa siunertaanngilaq. Inigisami init amerlassusaat ineqartut amerlassusaannit ikinneruppata ineqarnermut tapiisoqarsinnaassaaq.

Massakkut periaaseq atuuppoq, assersuutigalugu pensionisiaqartut angivallaamik ineqartut, mikinerusumik inissarsiorsimappata immikkut akuerineqartarlutik

§ 4-mut

Maannakkut atukkanut ilaapput kallerup innera, imeq kiassarnerlu, kingusinnerusukkullu akiligassanik allanik ilaqalersinnaapput, taamaattunik akiligassaqaalissagalarpat. Namminersortumik inissiani ineqarnermut akiliutaannaq atukkanullu aningaasartuutit immikkoortinneqartariaqarput.

Maannamut aaliangersagaasimasoq, akiligassanut akilinngitsuukkanut ineqarnermut tapiissutisisoqarsinnaanngitsoq pisariaqanngitsutut peerneqarpoq, pissutigalugu ineqarnermut tapiissutit siumoortumut qinnutigineqartarlutillu tunniunneqartarmata.

§ 5-mut

Aaliangersagaq iluarsineqarpoq isertitat akileraarutaasussat siunissami naatsorsuineri tunngavigneqartalissammata. Taanna naatsorsuineri tunngavissatut qinerneqarpoq siunissami annertusiartortumik pisortanit tunniunneqartartussat akileraaruteqaataasussanngornissaannut naapertuuttunngorlugu, taamaalilluni maleruagassat paasiuminartuunissaat aammalu isumaginninnerup iluani tunniuttakkat assigiinngitsut ataqatigiinnerunissaat anguneqassalluni.

Aaliangersakkap siunertaraa qinnuteqarnikkut naatsorsuineri tunngavigneqarsinnaammata isertitat ukiumit akileraarfimmit kingullermit allaanerut. Tamanna pisinnaavoq isertitat qaffariarneranni appariarnerannilu. Attartornermi ingerlaavartumi isertitat appariaateqarpata naatsorsuineri tunngavik § 10 malillugu iluarsineqarsinnaavoq.

Ukiup ingerlanerani nuuttoqartillugu isertitarilersimasat ukiumoortunngorlugit isertitariligassatut naatsorsoqqinneqartassapput.

§ 6-mut

Ineqarnermut tapiissutit naatsorsorneqarneranni inoqutigiit meerartaat 18-it inorlugit ukiullit apequtaapput. Ineqarnermut tapiissutit naatsorsorneqartarnerisa ingerlaavartuunissaa naatsorsuutigneqarpoq, tassa ingerlaavartumik appartinneqassammata inoqutigiinni meeqqat ilaat 18-inik ukioqalerpataamaaqataanillu qaffanneqartassalluni inoqutigiit meerartaqarnerulerpata. Iluarsiinerit taakku ineqarnermut tapiissutit ukiuanni pisassapput meeqqat amerlassusiisa allannguuteqarnerata kingorna qaammatip aallartinneraniit atuutilersumik.

Peqqussutit atuutileraneranut atatillugu aningaasartanut killiliussat il.il. nalunaarummi saqqummersinneqassapput.

§ 7-mut

Ineqarnermut tapiissutinik tunniussineri qinnuteqartoq paasitinneqassaaq, ineqarnermut tapiissutinik tunniussineri patsisissaatitaasut annertuumik allannguuteqarsimappata kommunimut nalunaarnissamik pisussaaffianik.

§ 8-mut

Peqqussutit atuuttoq malillugu inigisamut allamut nuunnermi ineqarnermut tapiissutit kigumoortumik tunniunneqarsinnaapput. Aalajangersagaq taanna peerneqarpoq, attartortut nuunnginnerminni inissiaq nuuffissartik nalunngereertarmassuk, taamaalillutillu siumoortumik ineqarnermut tapiissutinik qinnuteqarsinnaallutik. Qaammatip aallaqqaataaniunngitsoq inissiamut nuuttoqartillugu qaammatip tulluup aallaqqaataaniit ineqarnermut tapiissutit tunniunneqassapput.

§ 9-mut

Siunissami ineqarnermut tapiissutit ukiuata qaammatisiutit ukiuat malissavaat.

Aaliangersakkat qularnaarpaat ineqarnermut tapiissutisisinnaanissamut piumasaaqatit eqquutsinneqarnerisa ukiut tamaasa nalilersuiffigineqarsinnaanerat aammalu ineqarnermut tapiissutit ukioq akileraarfusoq ilisimaneqartoq kingulleq tunngavigalugu naatsorsorneqartarnissaat.

§ 10-mut

Aaliangersagaq atuutseqqinneqalissasoq siunnersuutigineqarpoq inoqutigiiit isertitaasa ukiup ingerlanerani appariaateqarneranni ineqarnermut tapiissutit naatsorsoqqinneqarsinnaanissaat tunngavissaqalersinniarlugu. Appariaateqarneq pilersinnaavoq assersuutigalugu toqusoqartillugu, ilinnialernerme imaluunniit avinnermi.

§ 11-mut

Ineqarnermut tapiissutit pillugit aaliangiineq pissaaq tunngavissatut inoqutigiiit amerlassusaat, isertitat il.il. pillugit paasissutissat aallaavigalugit.

§ 12-mut

Akiliisitsiniaaneq kommunip akiliisitsiniarnermut allaffianit ingerlanneqassaaq.

§ 13-mut

Kommunit Nunattalu Karsiata akornanni agguaqatigiinneq peqqussummi takuneqarsinnaavoq, maannakkutuunngitsoq, tassami maannakkut taamaallaat Aningaasaqarnermut Inatsimmi paasissutissat takuneqarsinnaammata.

§ 14-mut

Isumaginnittoqarfiup aqunneqarnera aqqissuussaanelu pillugit inatsisartut peqqussutaat tunngavigalugu kommunimit aaliagiinerit tamarmik Isumaginninnermi Naammagittaalliuuteqartarfimmut naammagittaalliuutigineqarsinnaapput. Taamaattoq aningaasatigut annertussusissatut Naalakkersuisunit nalunaarutigineqarsimasunut naapertuuttumik ineqarnermut tapiissutit pillugit aaliagikkat Isumaginninnermi Naammagittaalliuuteqartarfimmi allanngortinneqarsinnaanngillat.

§ 15-mut

Ineqarnermut tapiissutit pillugit peqqussut atuuttoq, boligstuttemit illuutitut atuutiinnassaaq 30. april 2002 tungaanut.

§ 16-mut

Siunnersuutigineqarpoq peqqussut atortuulissasoq ineqarnermut tapiissutinut naatsorsueriaaseq nutaaq siullermik ineqarnermut tapiissutit ukiuannut 2002-mi sunniuteqartussanngorlugu. Tunngavissaatitaavoq tamatuma peqatigisaanik inissiani attartortittakkani ineqarnermut meeqqanut tapiissutit pillugit aalajangersakkat atorunnaarsinneqarnissaat.